

# ALAHADY FAHA 33 MANDAVANTAONA - A



## AHAZOANA HASAMBARANA NY MIASA AMIN-KERIM-PO

Ry Kristianina havana, mamaram-parana ny taona litorjika isika ka ireo vakiteny atolotry ny Eglizy amintsika dia hanampy antsika handinika ny fiafaran'izao fiainantsika izao satria isika izay nohariana dia misy fiafarany ka hanomana an'izany farany izany no irin'ny Eglizy ampianarina antsika amin'ny alalan'ireo vakiteny arosony amintsika amin'izao Alahady faha 33 mandavantaona izao ka hanampy antsika bebe kokoa ho Kristy mpiara-belona amin'ireo manodidina antsika. Arakaraky ny fiheverantsika ny fiafarana izay no entintsika hamolavolana an'izao fiainana izao, raha isika mieritreritra fa tsy misy antenaina aorian'izao fiainana izao, aza gaga ary isika fa ny fahendren'izao tontolo izao no entintsika mamolavola ny fiainantsika andavanadro izany hoe hanararaotra isika noho ny fitiavan-tena ka hanapotika sy hanilikilika ny hafa fa raha ny fiainan-koavy fantatsika fa tsy fiafarana fa fidirana amin'ny tena fiainana iombonana amin'Andriamanitra dia miomana isika ary izay sahady ny nantitranterin'ny vakiteny tamintsika tamin'ny Alahady lasa teo raha nandinika ny virjiny adala sy ny virjiny hendry isika ; ny adala nandany ny menak'izy ireo, nandany amin'ny zavatra tsy misy antony ka rehefa tonga ny mpampakatra tsy nanana ny atolotra izy ireo fa ny virjiny hendry kosa nahay nikolokolo ity fiainana ity, toy izay taranaka mandrava sy manapotika izy dia nanorina sy nandavorary ary nanatsara, izany no mahatonga antsika milaza matetika hoe niany ny hoavy fa tsy amaray.

Vakiteny I : Ohab. 31, 10-13. 19-20. 30-31  
Tononkira : Salamo 127  
Vakiteny II : 1 Tes. 5, 1-6  
Evanjely : Mt. 25, 14-40

Amin'izao Alahady faha 33 mandavantaona izao, asain'ny

Eglizy isika amin'ny alalan'ireo vakiteny fa indrindra ny Evanjely hahay hampiasa ireo fanomezan'Andriamanitra amintsika dia ny taletantsika entina handavorariana ny fiainantsika sy hikolokoloantsika ity tranobe iombonantsika ity ka hifanasoa isika hikatsaka ny soa iombonana ary hanatsara mandrakariva ny fiainantsika ary dia hitondra antsika amin'ny hasambarana raha miasa isika amin-kerimpo tokoa amin'izay rehetra ataontsika satria izany no làlana.

Ny vakiteny voalohany ny bokin'ny Ohabolana dia manambara antsika fa ilay vehivavy voalaza io dia tsy iza fa isika eo anatrehan'Andriamanitra izany hoe vehivavy mahery fo isika mikarakara sy mikolokolo an'ity trano iombonana ity mba hamokatra araky ny averimberintsika matetika hoe ; harena ny harena raha mamokatra ary mamokatra ho an'ny besinimaro.

Ny harena voalohany dia isika olombelona, aoka ary ho harena tokoa isika ka hamokatra tsara eo amin'ny fiainantsika fa tsy hoe entanin'ny fitiavan-tena sy ny fialonana isika ka hifanaratsy sy hifanapotika fa kosa entanin'ilay fitiavana marina isika, ilay fihavanana irintsika tokoa ka hifampikarakara isika araky ny voalazan'ny vakiteny voalohany malala-tànana amin'ny mahantra. Maro karazana ny fahantrana mety mikiky antsika ka aoka isika hifanasoa araky ny hafatry Md Paoly "*ny amin'ny andro sy ny fotoana hiavian'ny Tompo, dia tsy ilaina akory ny hanoratanay izany aminareo, satria efa mahalala marina rahateo ianareo fa ho avy toy ny mpangalatra amin'ny alina ny andron'ny Tompo.*"

Aoka isika afaka hiomana amin'izany satria isika efa mahafantatra ny hoavy araky ny hamafisin'i Md Paoly amintsika. Tsy midika izany fa mahafantatra ny zavatra hitranga amin'ny hoavy rehetra isika fa ao amin'ny Tompo isika ka ao no mandavorary an'izay ho avy izay ka tsy tampoka ho antsika izay ary tsy hampatahotra antsika satria izy Tompo miara-dàlana amintsika mandrakariva sy maniraka antsika koa ho mpiara-dàlana amin'ny mpiara-belona amintsika ka hahatonga antsika ho Kristy ho azy ireo izany hoe ho fahazavana sy fanasina ka hizara ny harena lehibe ao amintsika dia ny maha zanak'Andriamanitra antsika izay midika fa manantena sy mino ao amin'Andriamanitra isika. Tsy hipetrapetra-potsiny anefa isika satria haren'Andriamanitra isika ka mila miasa manitatra ny fanjakany amin'ny alalan'ny fiasana miaraka aminy.

Izany no ampianarin'I Kristy amintsika amin'ny Evanjely androany amin'ny fanoharana mikasika ny talenta. Omen'Andriamanitra talenta isika tsy ho talenta tahirizina fa ampiasaina entina hanasoavana ny hafa ary atao izay mampamokatra azy, ny fahaizantsika mampamokatra azy eo amin'ny fiainantsika no anambarantsika fa zanak'Andriamanitra isika ary mahatoky antsika Andriamanitra. Tsy hampamokatra hanangona araky ny eritreritr'izao tontolo izao fa hampamokatra hanatsara ny hafa, mitady ny soa iombonana, hampanjaka ny rariny sy ny hitsiny eo amin'ny fiainantsika, tsy hanapotika, tsy handrava sanatria fa hanorina ka izany no atao hoe mampitombo ny talenta isika raha manorina, mikolokolo an'ity tranobe iombonana ity fa indrindra ho avy izao ny vanim-potoana hanaovana ny fambolen-kazo sy fanarahantsika maso ireny fambolena ireny. Ny talentantsika dia ho entintsika hanatsarana ny fiainantsika maha zanak'Andriamanitra antsika.

Dieny izao raha voakolokolo tsara ny fiainantsika ka nahay nitantana sy nikarakara isika dia lazain'ny Tompo amintsika hoe "*Tsara izany, ry mpanompo tsara sy mahatoky noho ianao nahatoky tamin'ny kely dia hataoko mpitantana ny be ianao: miaraha mifaly amin'ny tomponao.*". Izany no antenaintsika mba ho mpanompo mahatoky isika nahay

nampiasa ireo fanomezan'Andriamanitra, mpanompo tsara isika raha nahay nanasoa ny hafa tamin'ny alalan'ireo talenta nlmen'Andriamanitra antsika raha tsy izany kosa dia loza ho antsika ary dia efa fantantsika izany raha mandinika ny zava-boahary isika.

Ry Kristianina havana, aoka ary ny fitoriantsika ilay hafalian'ny vaovao mahafaly dia amin'ny alalan'ireo fanomezan'Andriamanitra omeny antsika tsy hoe ho tehirizintsika tahaka ilay mpanompo ratsy kamo voalaza amin'ny Evanjely androany, tsy hoe noho ny fahatahorana an'Andriamanitra tsy hihetsika isika, tsy izany fa aoka isika ho tahaka ireo mpanompo mahatoky sy tsara isika eo amin'ny fiainantsika ka hahatonga antsika ho Kristy mpiara-belona ka hanampy ireo mpiara-monina amintsika hahatsapa izay lalan-kombana izay.

Ry Jesoa Tomponay ô, ampianarinao izahay mba hampiasa ireo fanomezan'Andriamanitra anay ho entinay hanasoa ny hafa. Tsy sahy manao vy very ny aina izahay matetika, manjaka ny fitiavan-tena sy ny fialonana, ka ireo fanomezana nomenao anay, toy izay entinay hanasoavana ny hafa, noho ny fitiavan-tena, ny tahotra sy ny henamaso dia tsy hainay ny mampiasa azy ka ampio izahay mba hiara-hiasa aminao hanasoa ny namanay.

Aoka izahay tsy hatahotra hijoro amin'ny fiainanay andavanandro ho vavolombelonao tahaka an'I Victoire Rasoamanarivo sy Lucien Botovasoa hijoro mandrakariva ho famantarana sy fahazavana ary fanasina ho an'ireo manodidina anay. Omeo hery sy fahasoavana izahay hahay hanorina fa tsy hoe sanatria handrava sy hanapotika. Omeo fahasahiana izahay hanorina sy hanitatra ny fanjakanao hatraiza hatraiza ho voninahitrapo. Amen

Mompera Arserveka Mgr Benjamin Ramaroson